

## HGB-2, 65-75

### HIRU GIZONAK BAKARKA

*Off-abotsak:*

Nahi ta ezinaren  
txakolindegian,  
upel egarriaren  
ingurumarian  
hutsari borobilean  
bilduta.  
Herriaz ari dira  
Herriko hiru gizon  
bakarka.

*Hiru-gizonak:*

Zerbait dihoa sortzen  
Euskal herri hontan,  
Euskal herri hontan,  
jatortasun zainetik  
turrusta narotan;  
Zirriparra somatzen  
dut askoren baitan  
oikerizko uberkaz  
dakarren burrukan.  
Euskal aro berri bat  
ez al dugu bertan?

*Bi-gizonak:*

Herri bat dugu egin  
kanpotarren lerroz,  
kanpotarren lerroz,  
euskal oinarri xumez  
lotsa ginalakoz.  
Gizon bakoitzak bere  
bi oinak hor daukoz.  
Hobeto ahal lebilke  
inondiko zankoz?  
Lehendabizi balia  
gaitezen etxekoz.

*Bi-gizonak:*

Herriak bazituen  
bere oinarriak,  
bere oinarriak,  
hortxe daude lekuko  
asterren larriak.  
Zergatik ez galdetu

ta azertu harriak  
zein dira [sic] jakiteko  
gure giltzarriak?  
Herria ez du bizi  
baizik lokarriak.

*Hiru-gizonak:*

Euskaldun jaio nintzen  
ta erdaldun hazi,  
ta erdaldun hazi;  
mende hontan jaio ta  
ez nuen merezi.  
Erroma ta Grezia  
Espaina ta Prantzi...  
Euskalerririk ez zen  
kondairan ageri.  
Salve-ko erbestean  
geratu nintzen ni.

*Hiru-gizonak:*

Evaren ume honek  
bere desterruan,  
bere desterruan,  
herri bat zor ziela  
noizbait jakin zuan.  
Zegokion bezala  
ta ahal zuen moduan  
justizia eskatzen  
hasi zen puntuan  
kredoa errezatzen  
bizi da infernuan.

*Bi-gizonak:*

Gure handikientzat  
nik ez dut kanturik,  
gutxirentzat baizik;  
gehienek ez dute eman  
pauso bat jatorrik:  
Karguak hartu-ala,  
herriaz ahazturik,  
hor dabilta inongo  
mozolo eginik.  
Ez diegu Herriko  
lotsa beste zorrik.

*Bat-gizonak:*

Bildur naiz erre karen  
zuloak lapurtzen  
ditun mailu horren.  
Harrien errukarri

han dira erortzen  
zituzten ertz alaiak  
itzalak gordetzen  
kentzen dizkie kolpez  
ta ditu berdintzen  
dena borobil ez dut  
egoki aurkitzen.

*Bat-gizonak:*

Mila taxuz han zeuden  
erori baino lehen  
argia azkuratzen  
ertza, txokoa, ertza  
jeisten eta igotzen  
egunaren ondoren  
ziren abiatzen  
haren bideak zitun  
poztutzen nahiz mintzen  
argiak ere pena  
du orain sentitzen.

*Bat-gizonak:*

Harri banintz ez nuke  
nahiko erre kara  
mailu-pe hortara  
nere jatorri-aide  
nerea galtzera  
baina gizon naizenez  
jotzen dut bestera  
herbesteko errekan  
sartzen naiz gainera  
Euskal Herriko taxu  
guztia galtzera.

*Bi-gizonak:*

Garai honen kontra nik  
ezin dut deus jasan,  
inoiz bada oraintxe  
gaude gu aukeran:  
Etsaiak hor dauzkagu  
aspaldi erronkan.  
Gizonak behar dira  
bizi dugun kinkan.  
Nihork ez ahal dezan  
aitzakiarik eman,  
behar diot esan  
desafio gisan,  
jendea falta dela,  
euskaldunen sortan.

Plazan ezagutzen da

bat gizon ote den.  
Proba ederra dugu  
euskaldunok hemen:  
Asko ez da oraindik  
burrukara irten,  
nahiz ikusi Herria  
sokatira galtzen.  
Ea nortzuk duten  
behar hainbat kemen  
gogor dut galdetzen  
hitz gorriak ezten,  
gaurko gizonoz bihar  
lotsa ez daitezen.

*Hiru-gizonak:*

Oi arnasa haura, bizitza batez  
bizkortu nindun arnasa.  
Oi gizaldien ezpainez ezpain  
iritxi zaidan larrosa.  
Antolatzen dit zoragarritzko  
misteriozko mataza,  
bizi araziz neure herri zaharrak  
bizitu duen ametsa.

Nik herriari zor diodala  
herritik hartu dudana.  
Amaren bidez heldu zitzaidan  
euskal mezuen gutuna.  
Herri maitean kontserba dadin  
haien aide ta haien guna,  
utzi nahi diot, dardara gisa  
nigan duten oihartzuna.

Barrentzen naute neure lurrean  
arbasoen orporaino.  
Kondaira baten pixuz datozkit  
pausoak behartzeraino.  
Hartutakoa eramango dut  
geroaz odoltzeraino,  
jator-legea lehenago baitut  
bizitza-legea baino.

*Bat-gizonak:*

Doinu zahar baten inguruz dator  
euskal kantuen mezua  
hitz eta doinu bi-biak [sic] dute  
osatzen gure salmua  
herri-kantuen aide artean  
ikusi nuen mundua  
ipuiak ziren edo kondaira  
edo-ta frutu santua?  
haien oihartzun eraginazalez  
erein zidaten barrua.

Geroztik erne ta hazi zitzaidan  
lore gorri bat ariman  
hemen daramat, hemen bizi dut  
irtetzen zaidan kantuan  
gerrako garrek ez zuten erre  
Gernika kixkarratuan  
izotzak arren gordinik dago  
ondoko giro nahastuan  
gogorragoa giroa-eta  
gorriagoa orduan.

*Hirurak:*

Iraun nahiaren pena larriak  
darama gure bizitza.  
Ezinarekin oztopatzen da  
gure herriaren ekintza.  
Baina nahiaren bultzada dugu  
indar eta esperantza:  
Ai, eskuetan dugunarekin  
baliatuko bagintza.